

बाल-दिवस	मलाटी	समाधी	बकालत
मुंढली	धीऽ	सुर्गबास	अचकन
शिक्षा	अजादी	धर्मपत्नी	पशाक
पुरखे	कश्मीर	माता	मलाटी



देश भरै च 14 नवंबर दा दिन 'बाल दिवस' दे रूपा च मनाया जंदा ऐ। इस दिन 1889 ई. गी बच्चें दे 'चाचा नेहरू' हुंदा जन्म इलाहाबाद च होआ हा। इंदे पुरखे कश्मीर च रौहदे हे।

चाचा नेहरू हुंदा पूरा नांऽ पंडित जवाहर लाल नेहरू हा। इंदे पिता जी दा नांऽ पंडित मोतीलाल नेहरू ते माता जी दा नांऽ स्वरूप रानी हा। पंडित जवाहर लाल हुंदी धर्मपत्नी दा नांऽ श्रीमती कमला नेहरू हा ते इंदी इक्कै-इक धीऽ ही, जिसदा नांऽ इनें

प्रियदर्शनी इंदिरा रक्खेआ हा।

पंडित जवाहर लाल नेहरू हुंदी मुंढली पढ़ाई इलाहाबाद च गै होई, पर उच्च शिक्षा लेई इ'नेंगी 1905 ई. च इंगलैंड भेजेआ गेआ। उत्थुआं कनून दी उच्च-शिक्षा हासल करियै एह् भारत परतोई आए ते अपने पिता हुंदे कन्नै वकालत दा कम्म करन लगी पे।

महात्मा गांधी हुंदे कन्नै इ'ंदी मलाटी सन् 1916 ई. च होई ते उ'ंदे कन्नै इ'नें बी देश गी अजादी दोआने लेई कम्म कीता। अजाद भारत दे एह् पैहले प्रधानमंत्री बने हे। चूड़ीदार पजामा, अचकन ते किशतीघाट टोपी इ'ंदी मनपसिन्द पशाक ही। इ'नेंगी बच्चें कन्नै बड़ा प्यार हा। एह् बच्चें च बड़े लोकप्रिय हे। बच्चे इ'नेंगी प्यार कन्नै 'चाचा नेहरू' आखदे हे। 27 मेई, 1964 ई. गी इ'दा सुर्गबास होई गेआ। इ'ंदी समाधी दिल्ली च शांतिवन च बनाई गेदी ऐ।

अभ्यास

1. हेठ दित्ते दे सुआलें दे जवाब लिखो :-
 - (क) नेहरू हुंदा जन्म कदूं ते कु'त्थै होआ?
 - (ख) इ'ंदे पिता जी दा ते माता जी दा केह् नांऽ हा?
 - (ग) इ'ंदी मुंढली पढ़ाई कु'त्थै होई ही?
 - (घ) इ'नें इंगलैंड जाइयै कैह्दी पढ़ाई कीती ही?

(ड) चाचा नेहरू हुंदी समाधी कु'त्थै बनाई गेदी ऐ?

उद्देश्य : पाठै दा चेता दरहाना।

2. इस पाठ च आए दे व्यक्तियें ते थाहरें दे नांऽ पढ़ो ते लिखो:-

व्यक्तियें दे नांऽ

थाहरें दे नांऽ

(क) मोती लाल इलाहाबाद

(ख) स्वरूप रानी इंगलैंड

(ग) जवाहर लाल शांतिवन

(घ) कमला नेहरू भारत

(ड) प्रियदर्शनी इंदिरा कश्मीर

उद्देश्य : व्यक्ति वाचक संज्ञाएं गी पन्छानने दा अभ्यास।

3. हेठ दित्ते दे शब्दें कन्नै वाक्य पूरे करो :-

मुंढली, समाधी, बाल-दिवस, धीऽ

(क) नेहरू हुंदी पढ़ाई इलाहाबाद च गै होई।

(ख) चौदां नवंबर दा दिन दे रूपा च मनाया जंदा ऐ।

(ग) इंदी इक्कै-इक ही।

(घ) इंदी दिल्ली च शांतिवन च बनाई गई दी ऐ।

उद्देश्य : स्हेई शब्द-प्रयोग कन्नै वाक्य-पूर्ति दा अभ्यास।

4. हेठ लिखे दे वाक्यें दा शब्द-क्रम स्हेई करो :-

जि'यां :- होआ इलाहाबाद जन्म च हा हुंदा चाचा नेहरू।

स्हेई क्रम :- चाचा नेहरू हुंदा जन्म इलाहाबाद च होआ हा।

(क) सन् होई 1916 ई. च मलाटी गांधी महात्मा कन्नै हुंदे इंदी

(ख) बने प्रधानमंत्री भारत अजाद पैहले दे एह

(ग) गेआ भेजेआ इंगलैंड 1905 ई. च इ'नेंगी उच्च-शिक्षा लेई

(घ) दा हा नांऽ पिता जी इंदे नेहरू मोतीलाल

उद्देश्य : स्हेई शब्द-क्रम दा अभ्यास।

5. हेठ दित्ते दे शब्दें गी ठीक करियै लिखो :-

मनाआ, होया, जीसदा, मूंढली, करिये, मलाटि,
चुड़ीदार, दैश, कीशतीघाट, पेह्ले, सूर्गबास, मनपसीन्द

उद्देश्य : स्हेई हिज्जें दा ज्ञान।

अध्यापकें आस्तै निर्देश

इस पाठ च बरतोए दे व्यक्तियें ते थाहरें दे नाएं —
मोतीलाल, स्वरूप रानी, जवाहर लाल, कमला नेहरू, प्रियदर्शनी
इंदिरा, इलाहाबाद, इंगलैंड, शांतिवन, कश्मीर, भारत बगैरा दे हवाले
कन्नै विद्यार्थियें गी 'व्यक्तिवाचक संज्ञा' दी जानकारी कराई जाऽ।